



Matokeo Yatokanayo na Kuula

Mkate wa Uzima

Basi, sasa inadumu Imani, tumaini, upendo, haya matatu; na katika hayo lililo kuu ni upendo.—1 Wakorintho 13:13.

Tuna wingi wa mahubiri. Kinachohitajika zaidi ... ni upendo kwa roho zinazopotea, upendo ule unaokuja kwa mtiririko tele kutoka kwenye kiti cha enzi cha Mungu. Ukristo wa kweli unaeneza upendo kupitia kwa nafsi kamili. Unagusa kila sehemu muhimu, ubongo, moyo, mikono itoayo msaada, miguu, ukiwawezesha wanadamu kusimama imara pale ambapo Mungu anataka wasimame, ili wasitengeneze mapito yaliyopotoka kwa miguu yao, viwete wasije wakapotoshwa njiani. Upendo unaowaka na kuteketeza wa Kristo kwa roho zinazoangamia ni uzima wa mfumo mzima wa Ukristo.

Je! Tafsiri ya Biblia inasemaje juu ya Mungu? “Mungu ni upendo.” Kwa kumtoa Yesu kwa dunia yetu, Mungu alionesha upendo Wake kwa wanadamu. “Kwa maana jinsi hii Mungu aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele.” Ndiyo, “uzima wa milele.” Huu ni upendo ambao ni utimilifu wa sheria. Ni yule tu ambaye moyo wake umejawa na huruma kwa mwanadamu aliyeanguka, ambaye anapenda kwa kusudi, akionesha upendo wake kwa utendaji wa matendo kama ya Kristo, ndiye atakayeweza kustahimili kuonekana Kwake Yeye asiyeonekana. Ni yeye tu anayewapenda wanadamu wenzake kwa makusudi ndiye anayeweza kumjua Mungu. Yeye asiyewapenda wale ambao Baba amewafanyia mengi, hamjui Mungu. Hii ndiyo sababu kuna uhai mdogo sana wa kweli katika makanisa yetu. Teolojia haina thamani isipokuwa imejaa upendo wa Kristo.

Mungu ni mkuu. Upendo Wake katika moyo wa mwanadamu utaongoza kwa kufanya kazi ambayo itazaa matunda yanayofanana na tabia ya Mungu....

.. “Upendo huvumilia, hufadhili; upendo hauhusudu; upendo hautakabari; haujivuni; haukosi kuwa na adabu; hautafuti mambo yake; hauoni uchungu; hauhesabu mabaya; haufurahii udhalimu, bali hufurahi pamoja na kweli.” Majani yaliyobarikiwa ya mti wa uzima! “Basi, sasa inadumu imani, tumaini, upendo, haya matatu; na katika hayo lililo kuu ni upendo.”

“Ee nafsi yangu, umhimidi Bwana. Naam, vyote vilivyo ndani yangu vilihimidi jina Lake takatifu” kwa sababu Kitabu chetu cha mwongozo kiko wazi kabisa na thabiti. Wengine wanaweza wasifuate ule uwazi “Imeandikwa,” ambao Kristo aliutumia kwenye kila tukió ili kukabiliana na adui aliyeanguka, lakini hebu na tufuate mfano wa Mwokozi. Kadiri tunavyochelea kutoa maoni yetu ya kibinadamu, ndivyo mazungumzo yetu yatakavyokuwa safi na yenye neema zaidi. Bwana hutoa wito kwa ajili ya maneno matakatifu, kwa sababu ni harufu ya uzima iletayo uzima (Letter 156, 1900).